



Publicaziuns officialas dils 11-10-2019

Damonda da baghegiar

Nr. 105/2019

Datum da publicaziun: 11-10-2019
Patrun: Sunrise Communications AG, 8152 Glattpark
Representant: TM Concept AG, 5000 Aarau
Liug e parcelas: Ruinatscha; 6616
Object: midada d'antenna digl indrez per telefonia mobila GR581-5

Nr. 108/2019

Datum da publicaziun: 11-10-2019
Patrun: Wenzin Placi, 8880 Walenstadt
Representant: Robert Bundi SA, 7173 Surrein
Liug e parcelas: Plazzas Sut; 745 + 747
Object: construcziun d'ina suoschna d'autos, niev scaldament d'aria, novas finiastras ed ina nova cuvrída dil tetg

Ils profils ein tschentai ed ils plans da construcziun ein deponi tier la canzlia communal. L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Annunzias da baghegiar

All'istanza da baghegiar ei sin fundament digl art. 40 dall'ordinaziun davart la planisaziun dil territori dil cantun Grischun (OPTGR) vegniu annunziau suandonts projects:

Nr. 102/2019

Gianna Derungs Isler, 4056 Basilea; niev plaz da seser e nova stora da sulegl vid baghetg nr. 470 sin parcella nr. 122 a Rabiús-Catat.

Nr. 103/2019

Norbert Deplazes, 7173 Surrein; remedura dalla via sin parcella nr. 6510 a Surrein-Via spel Rein.

Nr. 104/2019

Armin Candinas, 7172 Rabiús; sanar ed engrondir plaz da seser sin parcella nr. 67 a Rabiús-Caho.

Sumvitg, 11-10-2019

Cumissiun da baghegiar

Elecziuns dil cussegl naziunal e dil cussegl dils stans dils 20-10-2019 mira pagina 3 da quest FUS

L'urna ei aviarta (en canzlia communal)

gievgia e venderdis mintgamai duront las uras da spurtegl dumengia, ils 20-10-2019, dallas 10.00 – 11.00 uras

Sonda e dumengia, ils 19 e 20 d'october 2019 mintgamai avon il survetsch divin en las fracziuns.

Ils cedels da votar ein vegni distribui. Tgi ch'ei aunc buca en possess da tals ei supplicaus da s'annunziar tier l'administraziun communal.

Adatg!

Il certificat da legitimaziun ei adina da presentar. Tier votaziuns cun posta ei il certificat da legitimaziun da suttascriber. Senza suttascripziun ei la votaziun nunvaleivla. Nus supplichein da consultar las informaziuns che Vus anfleis sin la cuviarta e sil certificat pil dretg da votar.

Sera d'orientaziun

Project protecziun encunter bovas ed auas gronda Val Luven a Rabius

Tenor la carta da prighels ein differentes quartiers dil vitg da Rabius periclitai entras bovas ed auas grondas. Ord quei motiv sesanflan plirs baghetgs dil vitg ella zona da prighel blava ni cotschna. Muort quella situaziun ha la suprastanza communal introduciu in project per sminuir il prighel entras bovas ed auas grondas per liung digl ual dalla Val Luven. La suprastanza communal ha perquei incaricau il biro d'inschignier Hunziker, Zarn & Partner AG d'elaborar in project corrispudent. El denter temps ha il biro incaricau terminau l'emprema fasa dalla planisaziun.

La suprastanza communal ei pertscharta ch'ei dat davart dils pertuccai sco era dils ulteriurs convischins damondas. Ord quei motiv envidein nus Vus ad ina sera d'orientaziun alla quala il project vegn presentaus en detagl. La sera d'orientaziun ha liug **venderdis, ils 25 d'october 2019 allas 20.00 uras** en casa da scola a Rabius.

Sumvitg, 11-10-2019

Suprastanza communal

Curdem da gronda dimensiun

La vischnaunca organischescha ina rimnada da rufid bloccont sco suonda:

Venderdis, ils 18 d'october 2019 dallas 08.00 - 18.00 uras

Ei vegn rimnau il rufid per l'entira vischnaunca sin la piazza Igniu (spel baghetg economic)

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas, per ex. ord rumidas da casas e clavaus ein da transportar directamein e sin cuost dil caschunader ella deponia regionala a Rueun. Rumians jamnils, q.v.d. rumians ch'ins dismetta el sac verd e rufid bloccont pign (dimensiuns max. 100 cm liung / 60 cm lad / 60 cm ault / peisa max. 30 kg) vegnan buca pri encunter. Tals rumians ein da plazzar als plazz da rimnada usitai els vitgs e che vegnan rimnai entras la Regiun Surselva mintgamai la mesjamna.

Ei vegn acceptau

- maschinas pintgas e mopeds mo cun tratg giu ieli e benzin,
- ferramenta, ferradira da tuttas sorts (meisas da fier, uaffens da fier, velos, e.a.v.),
- tut las maschinas electronicas (computers, frestgeras, maschinas da furar, pegnas d'electriche cun e senza ieli e.a.v.),

- mobilier movibel (letg, scaffa, suppia, madrazza, teppi denton buca culau giu, e.a.v.),
- requisits per il temps liber e sport (skis, indrez da trenament, velos e.a.v.) ch'ei pli gronds che 100 cm liung / 60 cm lad / 60 cm ault ni pli grevs che 30 kg,
- per pneus senza gavegl vegn incassau ina taxa da frs. 5.--, cun gavegl frs. 10.--,
- per pneus da maschinas agricolas pintgas vegn incassau ina taxa da frs. 20.-- e per pneus da tracturs frs. 50.--,
- calzers da skis san vegnir dai giu en favur dalla ARGO Tavau per frs. 5.--.

Buca acceptau vegnan

- tuttas maschinas agricolas,
- lenna da brisch, lenna veglia, lenna da baghetg (tabliaus, plantschius, lattas, quaders, panos, e.a.v.),
- sacs da pupi e da plastic,
- materials da pachetar (palets, stiropor, plastic, e.a.v.),
- requisits per il temps liber e sport ch'ei pli pigns che 100 cm liung / 60 cm lad / 60 cm ault e pli levs che 30 kg (bob, scarsola, calzers da rodas, aissa-rulletta e.a.v.),
- blachas da ballas da silo (verdas ed alvas),
- curdems da baghetg (linoleums, izolaziuns, plastics, folias da tetg e da preits, e.a.v.) e curdems da fatschentas,
- curdem verd da curtin e caglias, tals curdems san vegnir transportai sin la deponia verda ad Igniu,
- cartun e pupi duei vegnir surdau alla rimnada entras las scolas resp. las uniuns.

Ils suandonts rumians vegnan rimnai cun ils rumians jamnils e basegnan las marcas sco suonda:

- sacs tochen 50 kg; 1 marca da frs. 2.50,
- rumians pigns tochen 100 cm liung / 60 cm lad / 60 cm ault e pli levs che 12 kg; 2 marcas da frs. 2.50,
- rumians pigns tochen 100 cm liung / 60 cm lad / 60 cm ault entochen ina peisa da 30 kg; 3 marcas da frs. 2.50.

Nus appelein alla responsabladad da vischinas e vischins e supplichein da setener vid quellas directivas en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismessa da rumians e vegnan annunziadas als organs responsabels e puni.

Per ulteriuras informaziuns stat il genau responsabel bugen a Vossa disposiziun.

Sumvitg, 11-10-2019

Departament d'ambient

Uffeci forestal Sumvitg

Naven da gliendisdis, **ils 14 d'october 2019**, vegnan duas stortas dalla via d'uaul Glivers betunadas. Pertuccadas ein las stortas a Gutrusas e Cuolms da Tscheps. Per exequir las lavurs sto la via vegnir serrada naven dils Cuolms da Tscheps ensi per tut il traffic motorisau. La via resta era serrada sur notg e la fin d'jamna. A pei e cun velo eis ei pusseivel da passar. Las lavurs cuozan circa 3 – 4 jamnas.

Dapli informaziuns survegnis vus dil selvicultur da revier, Flurin Cathomas (079 681 19 67).
Engraziel per Vossa capientscha

Sumvitg, 11-10-2019

Uffeci forestal Sumvitg

Uffeci civil Surselva

Mortori

Ritter Beat, naschius ils 19-02-1932, morts ils 04-10-2019, staus sesents a Cumpadials.

Sumvitg, 11-10-2019

Controlla da habitonts

Serrada dalla via Rosas

A partir dils 19 d'uoost 2019 vegn il conduct d'aua dalla firma Axpo sanada sil tschancun denter Bogn Tenigia e Runcahez. Per exequir las lavurs sto la via da Rosas denter la Val Caho e la Val Camenisch vegnir serrada per tut il traffic motorisau. A pei e cun velo eis ei pusseivel da passar. Las lavurs cuozzan entochen la fin november 2019.

Dapli informaziuns survegnis vus tiel l'Axpo Hydro Surselva AG / Tavanasa tel. 081 929 25 11. Engraziel per Vossa capientscha.

Sumvig, 11-10-2019

Axpo Hydro Surselva AG

Preparaziun sin temps d'unviern

Tenor art. 69 dalla lescha da baghegiar ei la vischnaunca autorisada da schar dismetter la neiv dils implonts publics d'avertura sil schischom privat cunfinont cun prender il duiu risguard sin baghetgs, implonts e cultiras. Per liung dallas vias publicas e privatas ein seivs demontablas ni implonts da tal gener d'allontanar. Ultra da quei ston caglias e roma vegnir tagliadas anavos aschia che la rumida da neiv vegn buca impedida.

Quellas lavurs da preparaziun sil temps d'unviern ston vegnir exequidas entochen alla fin d'october 2019. En cass d'omissiun refusescha la vischnaunca suenter la sesiun d'unviern scadins donn occuri ord la rumida da neiv.

Sumvitg, 11-10-2019

Departament traffic

Rumida da neiv 2019/2020

La vischnaunca exequescha era uonn puspei sin incarica la rumida da neiv per privats. L'indemnisaziun per quella lavur corrispunda allas cundiziuns che l'industria privata pretenda. Plinavon sto quella dismessa da neiv star anavos en prioritad alla rumida dils implonts publics d'avertura. Sche pusseivel duei l'incarica vegnir surdada alla vischnaunca mo leu nua che quella procura era la dismessa dallas vias cunfinontas. Vischinas e vischins che vulan schar exequir la vischnaunca la rumida da neiv da lur vias e parcadis privats duront gl'unviern proxim ein supplicai d'annunziar quei a scret ni per telefon entochen ils **31 d'october 2019** al cau dil menaschi stradal (tel. 079 638 18 19).

Sumvitg, 11-10-2019

Departament traffic

Uniuns da dunnas dalla vischnaunca da Sumvitg

Per tut tgi che ha plascher da zambergiar cun lenn (Schwemmholz) organisein nus in cuors cun dunna Theolinda Wolff.

Datum: **Gliendisdis, ils 21-10-2019**

Liug: Casa da scola Sumvitg

Informaziuns ed annunzias entochen ils 15-10-2019 tier Olivia Decurtins tel. 079 663 32 00

Sin stedia participaziun selegnan las uniuns da dunnas.

Uniun da catschadurs Greina, Sumvitg

Invit alla tgira d'atun

Nus serimnein **sonda, ils 26 d'october 2019** sil parcadi dil plaz scola a Rabius.

Temps da lavur: 7.30–13.00

Plazza da lavur: Val Rabius

Uaffens: Vons, resgia da cadeina, capellina e caultschas da resgiar da segirtad.

Eventual sclariment dat nies cau da tgira Corsin Giger, tel. 078 736 97 90 ni sut

www.catschadurs-greina.ch Cun amicabels salids e sin seveser!

Per la suprastonza il cau da tgira, Corsin Giger

Uniun samaritana Sumvitg-Trun

Nies εμπrem exercezi tecnic suenter la pausa da stad ha liug **gliendisdis, ils 14 d'october 2019** dallas 20.00 a Sumvitg.

Nus sefatschentein cun ruttadiras e ligiaduras e selegrein sin stedia participaziun. Era bu commembers ein cordialmein envidai.

A bien seveser schein bugen!

La scolasta Bettina e la suprastonza

Societad da Tir volontaria Trun

Cuors da sittar cun buis d'aria cumprimida

Entschatta: 10-11-2019

Uras: 17.00

Liug: stan da sittar, Pustget

Annada: 2010 e pli vegls.

Annunzias prendel bugen encunter entochen ils 03-11-2019, Baseli Tomaschett, 081 943 33 43.

Sera d'informaziun per interessai dalla Scola da talents.Surselva

Dapli informaziuns sut Ilanz/Glion.

Infoabend für Interessierte der TalentSchule.Surselva

Mehr Informationen unter Ilanz/Glion.